



Fasnacht 2020

Glyych und doch verschiide

So glyych und doch verschiide isch e so n e Sache,
nur ains isch glyych: s Schnuurre driiber gid grad Grach.
Jä, was isch glyych, was nid, wo sin denn d Gränze?
E Blagiat isch au glyych, kasch aber nid drmit glänze.

Gar mänggi Lyt, die schrybe sich do d Finger wund,
sy mache n im Land und driiberuuse kund:
S sind alli nid nur gylchberächtigd, nai glyych
wär, was und wie au immer. Do froog y my doch schyych,
wie soll das go in däm helvetische Ryych,
wo jedi, jede stolz isch, eb e Gegg oder au e Gschyych,
nid Masse z sy, nai dytlig individuell
und sicher nid glych, im Gegedail: speziell.
Als Binggis ha n y gmaint, die mit de Regg,
das syge die Ryyche, jo, aber denn o Schregg:
das syg nid so, het me gly my beleert,
es syg vellicht grad eer umgekeert.
Drum hän denn allwä bald, die wo vorhär Regg hän draht,
grad langi Hose n aagleggt statt em e hibsche Glaid.
Denn speeter ha ny, no vyyle Bsiech im Zolli,
bald gspannt, Entdeggige gmacht, ganz tolli,
ganz anders als Hose und Regg macht s Unglyychsy uus,
persee,
sunscht gäbt s jo nämmlig gar kaini Buscheli mee.

Also Frau und Ma sin sälbverständlich glyych
im Rächt, wenn nid, so sage sy nid schyych:
Halt s Muul, was bi uns gilt, das sag do no immer yych,
drno muult s ander: denn isch unglyych also glyych.
S Glyychsy sälber isch iiberhaupt gar nid so wichtig,
s Begaupte, unglyych syg glyych, das isch s Richdig.
Was glyych und unglyych isch, sage ganz diräggd
die, wo finde, si syge ganz elai bolitisch korrägd.

Im Bolitische isch glyych und unglyych ebbe n au e Falle.
S het Soonigi, wo unglyych wänn sy, zem sich sälber z gfall:
D Martullo blocheret, es sygi s Rych
vo dr Mitti toll und syg doch aigetlig au glyych,
eb d Mensche deerte nit e so glyych
behandlet wärde, au wenn me n iiber Lyych
e goot, Gfängnis bedrybt fir Millioone,
dasch glyych, es duet sich trotzdäm loone:
es spiilt kai Rolle, wenn doch numme n ych,
jä dangg dr beschte Regierig, noo mee ryych
und ryycher wärde ka. Und s sisich no glunge,
scho Dy Urgsrossvater het s Lied vom e Kaiserrych gsunge.
Los Mägdeli, draum vom grosse Coup und sing:
Ych wär jo no so gärn d Co-Xi Jinping.
Und denn: au d Dier syge doch glyych wie d Menschehait,
spezielli Dierschitzer und -yyne hän das dytlig gsait,
Sy haige die glyyche Rächt wie iiri sapientes Verwandte,
s zueständig Gricht, das syge d Brämer Stadtmusikante.
Und däm sy Sitz, dä syg, y fänd das e n Idee, e tolli,
im grosse n Affehuus vom Basler Zolli.

Denn wird s aber grad no hailloos kompliziert,
die Intersektorjaliteet, die het my irritiert.
S git jo n e riise Zaal, wie ebber orientiert sy ka,
do länggd Naduur denn nimm, ob Frau, ob Ma.
Die het in dääne n Urtype no vyyl mee versteggd,
wo me n erscht no drei Millioone Joor jertz het entdeggd.
Die alli wänn eso verschiide woor gno sy,
und drum isch d Verschiidehait sälber s Glyychsy-Sy.

Und findsch no n em e Bruef e Stärnli und denn -yyne,
so isch das sproochlig aifach nur zem Gryyne.
Denn Bruefsbezaichnig elai, die maint doch alli,
sunscht bruucht ys, ass es alle wie immer Orientierte gfalli,
so zwanzig, dryssig Stärnli fir nur zfriideni Gschalte.
Denn waisch aber schon nimm, was d vom Satz aigetlig
hesch welle bhalte.
Kunnsch druus? E Bitz oder nid? S macht nyt,
dä Unterschiid vom Nid-Druusko, dä git Kit.
Gnau drum sin im unterschiedlige Druusko alli glych.
Und y sag n o däm allem: mir isch das jetze schysseglyych.

D Ladäärne-Uusstellig uff em Minschterplatz und d Waage- und Reggwisyte-
Uusstellig bi dr Kasäärne sin vom Määntig nacht bis am Mittwuch
demoorge! Deert und an de 3 Verkaufsständ (CINS) in dr Stadt ka men au
alli Zeedel und Schnitzelbängg, d Blagdedde und dr Rädäbäng kaufe.
Am Fritig und Samschtig, 6. und 7. Meerz 2020 isch Noochwuggswärbig vo
dr 1. Lektion im Zält uff em Barfi.
D'Zeedelläasete isch am Sunntig noo dr Fasnacht 2020, am 8. Meerz,
vom Fimfi bis am Siibeni zoobe, in dr Baseldytschi Bihni (im Lohnhof 4).
Dr Ytritt isch vergäabe. D Foyer-Bar isch vom Vieri ewägg offe.

As Gnopf ab 7 bisch bi de Verschnuuffer willkomme!
<http://www.verschnuuffer.ch>